




内閣文庫	
番號	漢 8829
冊數	65 (4)
函號	286 78





宋史新編目錄合卷三

卷七

本紀七

徽宗

建中靖國一
政和七

重和一

崇寧五
宣和七

大觀四

卷八

本紀八

欽宗

靖康二


卷九

本紀九

高宗

上建炎四

紹興元年至五年



后曰申王長有目疾於次端王當立惇曰簡王乃同母之弟且端王輕佻不可以君天下皇太后不以爲然知樞密院曾布叱惇宜如皇太后聖諭尚書左丞蔡卞中書門下侍郎許將皆曰合依皇太后聖諭皇太后又曰先帝嘗言端王有福壽且仁孝不同諸王於是惇默然乃召端王入卽位皇太后權同處分軍國事庚辰赦天下百官進秩一等辛巳尊先帝后劉氏爲元符皇后癸未追尊母陳氏爲皇太妃丙戌兄佖進封陳王戊子宰相章惇加封爵己丑弟侯似偁進封有差二月己亥始聽政丁未立王氏爲皇后庚申以韓忠彥爲門下侍郎

黃履爲尚書右丞辛酉名懿親宅潛邸曰龍德宮三月戊辰詔近臣各舉可任臺諫者甲申以王瞻棄青唐遂并棄邈川乃以西蕃王隴拶爲河西軍節度使賜姓名曰趙懷德邈川首領瞎征爲懷遠軍節度使夏四月丁酉朔日有食之甲辰以韓忠彥爲尚書右僕射兼中書侍郎李清臣爲門下侍郎蔣之奇同知樞密院事丁未以生日爲天寧節是月范純仁等復宮觀蘇軾等徙內郡召陳瓘鄒浩爲正言五月丙子詔復廢后孟氏爲元祐皇后乙酉蔡卞罷知江寧府己丑詔追復前宰執文彥博王珪司馬光呂公著呂大防劉摯等三十三人官

宋史新編卷七
秋七月丙寅朔皇太后詔罷同聽政辛卯封子亶爲韓國公八月壬寅葬哲宗于永泰陵九月辛未章惇罷知越州冬十月丙申出蔡京知永興軍貶章惇武昌軍節度副使丁酉以韓忠彥爲尚書左僕射兼門下侍郎壬寅以曾布爲右僕射兼中書侍郎己未詔禁曲學偏見妄意改作以害國事者辛酉罷平準務十一月戊寅以安燾知樞密院事庚辰黃履罷爲中太乙宮使己丑置春秋博士辛卯以范純禮爲尚書左丞是歲夏國高麗來貢遼遣使來弔祭及賀卽位其賀生辰正旦自是歲交遣使如故事

建中靖國元年春正月壬戌朔有赤氣亘天間白黑甲戌皇太后向氏崩遺詔追尊皇太妃陳氏爲皇太后遼主洪基卒孫延禧立二月丁巳貶章惇爲雷州司戶參軍三月丁丑詔以趙懷德知澶州夏四月辛卯朔日食不見五月丙寅葬欽聖憲肅向皇后欽慈陳皇后于永裕陵六月庚寅朔子亶進封京兆郡王戊午范純禮罷知潁昌府秋七月丙戌安燾罷知河南府丁亥以蔣之奇知樞密院事陸佃爲尚書右丞章棨同知樞密院事冬十月乙未李清臣罷知大名府十一月庚申以陸佃爲尚書左丞溫益爲尚書右丞庚辰合祀天地于圜丘

赦天下詔改明年元是歲河東地震京畿蝗江淮兩浙
湖南福建旱

崇寧元年春正月丁丑太原等十一郡地震詔振死者
家二月甲午子亶改名烜辛丑皇太妃朱氏薨追尊爲
皇太后庚戌追封孔鯉爲泗水侯孔伋爲沂水侯夏五
月庚申韓忠彥罷知大名府庚午前宰執司馬光文彥
博等四十四人奪官有差乙亥黜後苑內侍請以箔金
飾宮殿者戊寅葬欽成朱皇后于永裕陵己卯陸佃罷
知亳州庚辰以許將爲門下侍郎溫益爲中書侍郎蔡
京爲尚書左丞趙挺之爲尚書右丞六月癸丑追封伯

夷爲清惠侯叔齊爲仁惠侯閏月壬戌曾布罷知潤州
甲子詔諸路州縣官有治績最著者監司帥臣各舉一
人癸未詔諸路小使臣以上及親民官內有知謀勇果
可任將帥者監司帥臣各舉一人秋七月丙戌詔省臺
寺監及監司郡守竝以三年成任戊子以蔡京爲尚書
右僕射兼中書侍郎己丑焚元祐法甲午詔都省置講
議司以蔡京提舉庚子章粲罷爲中太乙宮使甲辰以
京畿大雨水壞民居詔振恤壓溺者辛亥罷春秋博士
八月乙卯子烜改名桓煥改名楷辛未詔郡縣置安濟
坊養民之貧病者甲戌詔天下興學貢士建外學于國

南丙子詔司馬光等二十一人子弟毋得官京師已卯以趙挺之爲尚書左丞張商英爲尚書右丞九月戊子置居養院以處鰥寡孤獨者乙未詔籍元符三年上書臣僚爲正邪各三等因旌擢鍾世美等四十一人降責范柔中等五百餘人丁酉治臣僚議復元祐皇后及謀廢元符皇后者罪降宰臣韓忠彥曾布官追貶李清臣爲雷州司戶參軍黃履爲祁州團練副使竄翰林學士曾肇御史中丞豐稷諫臣陳瓘龔夬等十七人于遠州已亥籍元祐及元符末宰相文彥博等侍從蘇軾等餘官秦觀等內臣張士良等武臣王獻可等凡百二十人

御書刻石端禮門冬十月癸亥蔣之奇罷知揚州甲戌以御史錢適石豫左膚及輔臣蔡京許將溫益趙挺之張商英等言罷元祐皇后之號復居瑤華宮丙子劉奉世等二十七人坐元符末黨與變法並罷祠祿戊寅以蔡卞知樞密院事十一月癸巳置西南兩京宗正司及敦宗院分處宗室非袒免親者戊申子楷封高密郡王十二月癸丑論棄遼州罪前宰執韓忠彥曾布安燾范純禮貶官有差丁丑詔邪說詖行及元祐學術政事並勿施用是歲京畿京東河北淮南蝗江浙福建熙河潭衡郴州旱

二年春正月乙酉任伯雨陳瓘龔夬鄒浩竝竄嶺南馬涓等九人分貶諸州是月知荆南舒亶平辰流州徭賊復誠徽州詔進宣官壬辰中書侍郎溫益卒丁未以蔡京爲尚書左僕射兼門下侍郎二月甲寅進元符皇后爲太后夏四月丁卯詔毀呂公著司馬光呂大防范純仁劉摯范百祿梁燾王巖叟景靈宮繪像乙亥詔毀刊行范祖禹唐鑑并三蘇秦觀黃庭堅等文集戊寅以趙挺之爲中書侍郎張商英爲尚書左丞吳居厚爲尚書右丞安惇同知樞密院事奪王珪贈諡追毀程頤出身文字其所著書令監司覺察六月內侍童貫及安撫王

厚復湟州秋七月辛巳以復湟州進蔡京蔡卞官乙巳詔責降人子弟毋得任在京及府界差遣八月丁未朔再論棄湟州罪韓忠彥等再貶官有差戊申張商英罷知亳州九月癸巳令天下州郡各建崇寧寺辛丑令天下監司長吏廳各立元祐姦黨碑是歲置諸路茶場更鹽鈔法于闐來貢

三年春正月戊子鑄當十大錢甲辰鑄九鼎二月庚申令天下阮冶金銀復輸內藏三月辛巳置文繡院辛丑大內災夏四月乙卯復鄆州辛酉復廓州是月封子楫樂安郡王未幾卒五月論復鄆廓功進蔡京司空封嘉

國公許將趙挺之吳居厚安惇蔡卞各轉三官六月壬寅朔圖熙寧元豐功臣於顯謨閣癸酉詔以王安石配享孔子廟壬子置書畫筭學戊午詔重定元祐元符姦黨及上書邪等者合爲元祐黨籍文臣曾任宰臣執政官二十七人司馬光文彥博呂公著呂大防劉摯范純仁韓忠彥曾布梁燾王巖叟蘇轍王存鄭雍傅堯俞趙瞻韓維孫固范百祿胡宗愈李清臣劉奉世范純禮安燾陸佃黃履張商英蔣之奇曾任待制以上官四十九人蘇軾劉安世范祖禹朱光庭姚勔趙君錫馬默孔武仲孔文仲吳安持錢勰李之純孫覺鮮于侁趙彥若趙

鹵王欽臣孫升李周王汾韓川顧臨賈易呂希純曾肇王覲范純粹呂陶王古豐稷張舜民張問楊畏鄒浩陳次升謝文瓘岑象求周鼎徐勣路昌衡董敦逸上官均葉濤郭知章楊康國龔原朱紱葉祖洽朱師服餘官一百七十七人秦觀黃庭堅晁補之張耒吳安詩歐陽棐劉唐老王鞏呂希哲杜純張保源孔平仲湯檝司馬康宋保國黃隱畢仲游常安民汪行余爽鄭俠常立程頤唐義問余卞李格非陳瓘任伯雨張庭堅馬涓孫諤陳鄂朱光裔蘇嘉龔夫王回呂希績吳儔歐陽中立尹材葉伸李茂直吳處厚李積中商倚陳祐虞防李祉李深

李之儀、范正平、曹蓋、楊琳、蘇昞、葛茂宗、劉謂、柴袞、洪羽、趙天佑、李新、衡鈞、充公適、洪伯藥、周誼、孫琮、范柔中、鄧考甫、王察、趙岫、封覺民、胡端脩、李傑、李賁、趙令崎、郭執中、石芳、金極、高公應、安信之、張集、黃策、吳安遜、周永徽、高漸、張夙、鮮于綽、呂諒卿、王貫、朱紘、吳朋、梁安國、王古、蘇迥、檀固、何大受、王箴、鹿敏求、江公望、曾紆、高士育、鄧忠臣、种師極、韓治、都貺、秦希甫、錢景祥、周緯、何大正、呂彥祖、梁寬、沈千、曹興宗、羅鼎臣、劉勃、王拯、黃安期、陳師錫、于肇、黃遷、莫快、許堯輔、楊肱、胡良、梅君俞、寇宗顏、張居、李脩、逢純、熙高、遵恪、黃才、曹盥、侯顯道、周遵道、林膚

葛輝、宋壽岳、王公彥、王交、張溥、許安脩、劉吉甫、胡潛、董祥、楊懷寶、倪直孺、蔣津、王守、鄧元中、梁俊民、王陽、張裕、陸表民、葉世英、謝潛、陳唐、劉經國、扈充、張恕、陳弁、洪芻、周諤、蕭利、趙鉞、滕友、江洵、方适、許端卿、李昭玘、向紉、陳察、鍾正甫、高茂華、楊彥璋、廖正一、李夷行、彭醇、梁士能、武臣二十五人、張巽、李備、王獻可、胡田、馬諗、王履、趙希夷、任濬、郭子旂、錢盛、趙希德、王長民、李冰、王庭臣、吉師雄、李愚、吳休復、崔昌符、潘滋、高士權、李嘉亮、李琬、劉延肇、姚雄、李基、內臣二十八人、梁惟簡、陳行、張士良、梁知新、李倬、譚辰、竇鉞、趙約、黃卿從、馮說、曾燾、蘇舜民、楊侁

宋史紀事本末卷之七
梁弼、陳恂、張茂則、張琳、裴彥臣、李偁、閻守勲、王紘、李穆、
蔡克明、王化基、王道、鄧世昌、鄭居簡、張怙為臣不忠，曾
任宰臣二人。王珪、章惇通三百九人刻石朝堂，餘竝出
籍。自今毋得復彈奏。秋七月辛卯，復行方田法。是月，魏
漢津鑄景鐘成。八月丙午，許將罷，知河南府。九月乙亥，
以趙挺之為門下侍郎，吳居厚為中書侍郎，張康國為
尚書左丞，鄧洵武為尚書右丞。壬辰，詔諸路州學別置
齋舍，養材武之士。冬十月戊午，夏人入涇原，圍平夏城。
寇鎮戎軍。己巳，立九廟，復翼祖。宣祖十一月甲戌，幸太
學官論定之士十六人，遂幸辟雍司業以下，賜賚有差。

丁亥，詔取士竝繇學校罷發解，及省試法。丙申，祀昊天
上帝于圜丘，赦天下。十二月戊午，同知樞密院事安惇
卒。是歲諸路蝗，京畿大雨，水官瘞，壓溺者。黎洞蠻楊晟
免等內附，占城來貢。

四年春正月丙戌，築溪哥城。丙申，蔡卞罷，知河南府。丁
酉，以內侍童貫為熙河蘭湟秦鳳路經略安撫制置使。
二月乙巳，築御謀城。甲寅，以張康國知樞密院事。劉逵
同知樞密院事。何執中為尚書左丞。閏月壬申，令州縣
倣尚書六曹分六案。甲申，鑄當二夾錫鐵錢。三月甲辰，
以趙挺之為尚書右僕射兼中書侍郎。戊午，復銀州。是

宋史新編卷七
月夏人與羌酋合兵圍宣威城殺知鄯州高永年王厚
坐敗夏四月辛未遼遣使爲夏人請舊疆及緩師是月
夏人屢入寇五月戊申除黨人父兄子弟之禁六月趙
挺之罷爲中太乙宮使賜信州道士張繼元號虛靖先
生秋七月辛丑置四輔郡甲寅詔奪元祐輔臣墳寺丁
巳還土書流人八月奠九鼎于九成宮親行酌獻禮九
月朔御大慶殿受賀用新樂詔曰禮樂之興百年於此
然去聖愈遠遺聲弗存迺者得隱逸之士於草茅之賤
獲英莖之器於受命之邦適時之宜以身爲度鑄鼎以
起律因律以制器按協於庭八音克諧昔堯有太章舜

有大韶三代之王亦各異名今追千載而成一代之制
宜賜新樂之名曰大晟朕將薦郊廟享鬼神和萬邦與
天下共之其舊樂勿用巳亥赦天下乙巳詔元祐人貶
謫者徙近地惟不得至畿輔是歲自七月雨至于十月
蘇湖秀三州水振之知桂州王祖道奏黎洞王江蠻內
附占城來貢

五年春正月戊戌彗出西方長竟天甲辰以吳居厚爲
門下侍郎劉逵爲中書侍郎乙巳以星變詔求直言毀
元祐黨人碑復謫者仕籍丁未以太白晝見赦天下除
黨人一切之禁二月丙寅蔡京罷爲中太乙宮使以趙

挺之爲特進尚書右僕射兼中書侍郎三月丙申罷求
直言丙辰蔡王似卒夏四月丁丑停免兩浙水災州郡
夏稅五月丁未班紀元曆乙卯罷辟舉復元豐選法秋
七月庚寅朔日當食不虧壬寅詔改明年元九月辛丑
河南府嘉禾與芝草同本生冬十一月辛卯陳王似卒
十二月戊午朔日當食不虧羣臣稱賀己未劉遵罷知
亳州是歲黎洞蠻韋晏開等內附蒲甘來貢

大觀元年春正月戊子朔改元赦天下甲午以蔡京爲
尚書左僕射兼門下侍郎庚子置議禮局於尚書省壬
寅吳居厚罷爲太乙宮使戊申進封弟侯魏王偲鄧王

三月丁酉趙挺之罷爲佑神觀使以何執中爲門下侍
郎鄧洵武爲中書侍郎梁子美爲尚書左丞朱諤爲尚
書右丞甲辰立八行取士科夏五月庚寅鄧洵武罷知
隨州癸卯詔諸路監司勿任元祐學術及異意者六月
己未以梁子美爲中書侍郎甲子以黎人地爲庭孚二
州乙亥尚書右丞朱諤卒秋八月庚申以徐處仁爲尚
書右丞林摠同知樞密院事九月辛亥大饗明堂赦天
下侍御史沈畸御史蕭服坐平反章縱獄貶縱竄海島
冬閏十月丙戌以林摠爲尚書左丞鄭居中同知樞密
院事乙未詔曰國家休養生民垂百五十年生齒日繁

而戶部民籍會不加益州縣於進丁入老收落失實以
故課役不均皆守令弛職可申嚴考課法立鎮州爲靖
海軍十一月壬子朔日有食之蔡京以不及所當食分
率羣臣稱賀戊寅廣西經略使王祖道殺南丹州刺史
莫公佞以其地爲觀州尚書右丞徐處仁母喪去位十
二月庚寅以開邊功進蔡京王祖道官是歲甘露降九
成宮帝鼎內汀懷三州慶雲見乾寧軍同州黃河清秦
鳳旱京東水河洛溢振之涪州夷駱世華等內附以其
地爲珍承州于闐夏國來貢
二年春正月壬子朔受八寶子大慶殿赦天下己未進

蔡京童貫官庚申進封弟侯燕王偲越王子桓定王楷
樞杞榭械構並進封有差戊寅河東北盜起三月庚申
班金籙靈寶道場儀範于天下夏四月甲辰復洮州五
月庚戌朔日有食之辛亥以復洮州功賜蔡京王帶加
童貫官秋八月丙申梁子美罷知鄆州九月辛亥以林
摠爲中書侍郎余深爲尚書左丞癸酉皇后王氏崩冬
十二月壬寅葬靖和王皇后于永裕陵是歲同州黃河
清邢州河溢壞民舍振之于闐夏國來貢知桂州張莊
奏安化諸州蠻內附詔以莊爲黔南安撫使是時渝州
蠻亦內附以其地爲溱州

三年春二月丙子朔播州楊文貴納土以其地置遵義
軍三月壬申知樞密院事張康國卒夏四月戊寅林摠
罷知滁州癸巳以鄭居中知樞密院事管師仁同知樞
密院事癸卯以余深為中書侍郎薛昂為尚書左丞劉
正夫為尚書右丞五月乙巳朔孟翊獻所畫卦象謂宋
將中微宜更年號改官名變庶事以厭之帝不樂詔竄
遠方六月甲戌朔管師仁罷為佑神觀使丁丑蔡京罷
為中太乙宮使辛巳以何執中為特進尚書左僕射兼
門下侍郎瀘州夷內附以其地為純磁州冬十二月巳
亥罷鑄錢新法是歲閹婆占城夏國來貢江淮荆浙福

建旱秦鳳階成饑振之陝州同州黃河清京師甘露再
降自是歲有甘露之瑞語在五行志

四年春二月巳丑以余深為門下侍郎張商英為中書
侍郎侯蒙同知樞密院事夏五月丁未彗出奎婁甲寅
立詞學兼茂科丙辰以星變避殿減膳求直言戊午赦
天下癸亥治廣西妄言拓地罪追貶王祖道為昭信軍
節度副使放張莊于永州甲子貶蔡京官丙寅余深罷
知青州六月乙亥以張商英為尚書右僕射兼中書侍
郎丙申薛昂罷知江寧府秋八月乙亥以劉正夫為中
書侍郎侯蒙為尚書左丞鄧洵仁為尚書右丞庚辰以

宋史新編卷之十一
吳居厚爲門下侍郎閏月辛酉以張閣知杭州兼領花
石綱九月丙寅朔日有食之冬十月丁酉立貴妃鄭氏
爲皇后鄭居中罷爲中太乙宮使戊戌以吳居厚知樞
密院事十一月丁卯祀昊天上帝于圜丘赦天下改明
年元是歲夔州江水溢海水清夏國來貢南丹州蠻莫
公晟內附

政和元年春正月壬辰詔百官厲名節三月癸酉以王
襄同知樞密院事夏五月戊辰改當十錢爲當三秋八
月丁巳張商英罷知河南府九月戊寅王襄罷知亳州
是月鄭允中童貫使遼以李良嗣來良嗣獻取燕之策

賜姓趙冬十二月巳酉詔臺諫以直道敷是非毋憚大
吏毋比近習是歲虔州芝草生蔡州瑞麥連野河南府
嘉禾生野蠶成繭交趾夏國來貢

二年春二月戊子朔祭京復太師致仕賜第京師夏五
月巳巳蔡京落致仕三日一至都堂議事六月巳丑以
余深爲門下侍郎秋七月丙子置禮制局九月壬午改
太尉以冠武階癸未正三公三孤官改侍中爲左輔中
書令爲右弼左右僕射爲太宰少宰罷尚書令冬十月
乙巳得玉圭於民間十一月戊寅日南至受元圭于大
慶殿赦天下辛巳太師蔡京進封魯國公何執中爲少

傳太宰執政皆進秩十二月甲申行給地牧馬法是歲蜀夷內附置亨祺州高麗來貢三年春正月癸酉追封王安石及子遯配饗孔廟丁丑吳居厚罷知洪州以鄭居中知樞密院事二月辛卯崇恩太后劉氏暴崩甲午以遼女真相持詔飭邊防三月壬子朔日有食之夏四月戊子作保和殿乙巳作玉清和陽宮癸巳鄧洵仁罷知亳州巳酉以薛昂爲尚書右丞庚戌班五禮新儀五月丙午葬昭懷劉皇后于永泰陵巳酉頒新燕樂秋八月丙子以何執中爲少師九月戊戌貴妃劉氏薨追冊爲皇后冬十一月癸未祀昊天

上帝于園丘大赦是歲賜方士王老志號洞微先生詔天下訪求道教仙經江東阜溫封磁三州火

四年春正月戊寅置道階二十六等二月癸酉子定王桓冠夏五月丙戌祭地于方澤以太祖配赦天下六月壬申以廣西溪洞地置隆兌二州秋八月新作延福宮成冬十二月詔廣南市舶司歲貢真珠犀角象齒是冬都水使者孟昌齡獻議導河大伾置永遠浮橋從之五年春正月壬申朔女真完顏阿骨打稱帝國號金庚辰瀘南晏州夷反詔轉運使趙適等討平之二月甲寅冊定王桓爲皇太子赦天下庚午以童貫領六路邊事

夏四月甲辰作葆真宮秋七月戊辰朔日有食之丁丑
新作明堂詔曰宗祀明堂以配上帝寓於寢殿禮蓋云
闕崇寧之初嘗詔建立去古既遠歷代之模無足循襲
朕刺經稽古度以九筵分其五室通以八方上圓下方
參合先王之制相方視址于寢之南僞工鳩材自我作
古以稱朕昭事上帝率見昭考之心庚子御製大伾三
山橋銘冬十一月庚寅高麗遣子弟入學是歲賜方士
王仔昔號沖隱處士尋進通妙先生平江府常湖秀州
水

六年春正月戊子以瀘南獻捷轉宰執官以童貫宣撫

陝西河北閏月丁未置道學夏四月乙丑大內作上清
寶籙宮成會道士辛未太宰何執中致仕庚寅詔蔡京
三日一朝正公相位總治三省事五月庚子以鄭居中
為少保太宰兼門下侍郎劉正夫為特進少宰兼中書
侍郎壬寅以鄧洵武知樞密院事六月癸未冊朱氏為
皇太子妃秋八月壬午詔天下監司郡守搜訪巖谷之
士雖恢詭譎怪自晦者悉以名聞九月辛卯朔詣玉清
和陽宮上玉皇上帝徽號冊寶丙申赦天下令洞天福
地修宮觀塑造聖像冬十一月己亥祀昊天上帝于圜
丘赦天下庚子以白時中為尚書右丞戊申以侯蒙為

宋史新編卷之七
中書侍郎薛昂為尚書左丞十二月戊寅以熙河進築
功成進宰執官乙酉少宰劉正夫致仕是歲茂州夷內
附置壽寧延寧軍賜方士林靈素號通真達靈先生冀
州三山黃河清高麗占城大食真臘大理夏國來貢
七年春二月甲子會道士二千餘人于上清寶籙宮詔
林靈素諭以帝君降臨事夏四月庚申帝諷道錄院曰
朕乃上帝元子為太霄帝君憫中華被金狄之教遂懇
上帝願為人主令天下歸於正道卿等可上章冊朕為
教主道君皇帝五月己丑詣玉清和陽宮上皇地祇徽
號冊寶辛丑祭地于方澤赦天下癸卯改玉清和陽宮

為玉清神霄宮秋八月癸亥太宰鄭居中母喪去位九
月辛卯大饗明堂并祀五帝赦天下丁酉西蕃王子益
麻党征降見于紫宸殿冬十月乙卯朔初御明堂班朔
布政戊寅侯蒙罷知亳州十一月庚寅命蔡京五日一
赴都堂治事辛卯太宰鄭居中起復以余深為特進少
宰兼中書侍郎白時中為中書侍郎十二月丁巳以薛
昂為門下侍郎戊辰詔天神降于坤寧殿刻石紀之庚
午以童貫願樞密院事命戶部侍郎孟揆作萬歲山事
具地理志是歲三山河水清熙河環慶涇原地震于闐
來貢

重和元年春正月甲申朔受定命寶于大慶殿己丑赦天下庚戌以王黼爲尚書左丞二月庚子遣武義大夫馬政浮海使金約夾攻遼夏五月壬午朔日有食之丁亥以林靈素爲通真達靈元妙先生張虛白爲通元冲妙先生秋七月壬午以西師有功加蔡京恩鄭居中爲少傅余深爲少保鄧洵武以下並進秩八月甲寅以童貫爲太保辛酉詔班御註道德經九月辛巳大饗明堂丙戌詔太學辟雍各置內經道德經莊子列子博士庚寅薛昂罷爲佑神觀使以白時中爲門下侍郎王黼爲中書侍郎馮熙載爲尚書左丞范致虛爲尚書右丞辛

丑太宰鄭居中罷起復閏月丁卯子楷進封鄆王丙子立恭帝後監周陵廟世世爲國三恪是月集古今道教事爲紀志賜名道史作神霄九鼎冬十月甲辰置道官二十六等道職八等十一月己酉朔改元大赦天下是歲掖庭大火江淮荆浙梓州水振之于闐高麗來貢宣和元年春正月壬子進封子樞肅王祀景王乙卯詔佛改號大覺金僊僧爲德士寺爲宮院爲觀丁巳金人使李善慶來遣趙有開報聘不至而復戊午以余深爲太宰兼門下侍郎王黼爲特進少宰兼中書侍郎乙亥躬耕籍田二月庚辰改元易宣和殿爲保和殿戊戌以

宋史紀事本末卷之四
鄧洵武爲少保三月庚戌蔡京等進安州所得商六鼎
已未以馮熙載爲中書侍郎范致虛爲尚書左丞張邦
昌爲尚書右丞童貫遣知熙州劉法攻統安城夏人伏
兵擊之法敗殿甲戌皇后親蠶夏四月丙子朔日有食
之童貫遣兵取朔方敗績劉法死之貫以捷聞論功行
賞五月丁未詔德士並許入道學依道士法丙辰童貫
奏言敗夏人于震武壬申班御製九星二十八宿朝元
冠服圖是月大水犯都城起居郎李綱奏求直言以答
天戒坐貶六月甲申封莊周爲微妙元通真君列禦寇
爲致虛觀妙真君仍行冊命配享混元皇帝己亥夏國

遣使納款詔六路罷兵秋七月甲寅以童貫爲太傅八
月丁酉尚書左丞范致虛母喪去位九月辛酉大饗明
堂亥十月甲戌以紹述熙豐政事書布告天下十一月
乙卯祀昊天上帝于圜丘赦天下戊辰以張邦昌爲尚
書左丞王安中爲尚書右丞時朱勔以花石綱媚上東
南騷動太學生鄧肅進詩諷諫詔放歸田里十二月丙
申正字曹輔上書諫微行編管郴州是冬開修兔源河
并直河畢工詔獎諭是歲召楊時爲祕書郎京西饑淮
東旱東南諸路水嵐州黃河清
二年春正月甲子罷道學夏五月丁巳祭地于方澤布

衣朱夢說上書論宦寺編管池州六月戊寅詔蔡京致仕丁亥復寺院額秋九月乙巳復德士爲僧辛亥大饗明堂丙辰復遣馬政使金議攻遼癸亥以余深爲少傅冬十月戊辰朔日有食之建德軍妖賊方臘及命內侍譚稹討之語在童貫傳十一月己亥余深罷知福州庚戌以王黼爲少保太宰兼門下侍郎十二月丁亥改譚稹爲兩浙制置使以童貫爲江淮荆浙宣撫使討方臘是月方臘陷建德歙州東南將郭師中戰死又陷杭州廉訪使者趙約詬賊死是歲淮南旱真臘夏國來貢三年春正月戊午進封子栩濟王模樂安郡王辛酉罷

蘇杭州造作局及御前綱運乙丑罷木石彩色等場務是月方臘陷婺州又陷衢州守臣彭汝方死之二月庚午罷方田癸巳赦天下是月方臘陷處州淮南盜宋江等犯諸郡命知海州張叔夜招降之夏四月庚寅忠州防禦使辛興宗擒方臘于清溪癸巳汝州牛生麒麟五月戊戌以鄭居中領樞密院事甲辰貴妃劉氏薨追冊爲皇后丙午金人再遣曷魯等來癸亥御史中丞陳過庭張汝霖以乞罷御前使喚及歲進花果竝貶竄閏月復應奉司命宰相王黼及內侍太尉梁師成領之秋七月丁亥廢新置純磁等十二州是月洛陽京畿訛言有

宋史新編卷七
黑青如人或如夫夜出掠小兒食之二歲乃息八月乙巳以童貫爲太師九月丙寅以王黼爲少傅鄭居中爲少師辛未大饗明堂冬十月甲寅童貫復領陝西兩河宣撫十一月丁丑馮熙載罷知亳州以張邦昌爲中書侍郎王安中爲尚書左丞李邦彥爲尚書右丞是月河決清河埽十二月辛卯朔日中有黑子自崇寧三年至此凡五見壬子進封子構康王模祁王是歲諸路蝗水壞天成聖功橋詔宦者李彥括民田于東南西路四年春正月丁卯以蔡攸爲少保癸酉金人破遼中京遼王出奔三月丙子金人來約夾攻遼命童貫屯兵于

邊以應之夏四月丙午詔錄三館書置宣和殿及太清樓祕閣五月乙亥以蔡攸爲河北河東宣撫副使六月巳丑帝聞攻遼兵敗詔班師壬寅以王黼爲少師秋七月壬午詔童貫蔡攸再舉伐遼以河陽二城節度使劉延慶爲都統制九月戊午朝散郎宋昭上書諫北伐除名廣南編管巳未金人來議師期辛酉大饗明堂甲戌遣趙良嗣報聘于金巳卯遼涿州留守郭藥師以涿易二州來降冬十月改燕山府爲燕山府以蔡攸爲少傅判燕山府郭藥師等襲燕屢敗績劉延慶燒營夜遁軍潰遼將蕭幹追至涿水乃還十一月庚午祀昊天上帝于

園丘赦天下戊寅金人來許山前六州十二月戊子復遣趙良嗣報聘于金求營平灤三州辛卯金人入燕遼蕭后出奔壬辰金人來獻捷壬寅子植進封莘王五年春正月戊午金人遣李靖來議所許六州代租錢已未趙良嗣復如金求西涼等州辛酉王安中罷知燕山府郭藥師同知府事二月乙酉朔以李邦彥爲尚書左丞趙野爲尚書右丞丙戌金人以議未合斷橋梁焚次舍丁酉進封子朴華原郡王棣高平郡王三月乙卯金人再遣寧朮割等來時宋許納遼人舊歲幣四十萬仍歲加燕京代租錢一百萬緡金但許歸燕京及六州

已未遣盧益報聘于金皆如其約夏四月癸巳金人遣楊璞以誓書及燕京涿易檀順景薊州來歸五月以收復燕雲賜宰臣王黼玉帶復以王黼爲太傅總治三省事鄭居中爲太保蔡攸爲少師童貫封徐豫國公癸酉祭地于方澤六月丙戌知平州張覺叛金以州來附丁未知樞密院事鄭居中致仕翌日卒辛亥以蔡攸領樞密院事秋七月戊午以梁師成爲少保已未太師童貫致仕起復譚稹爲河北等路宣撫使庚午禁元祐學術八月辛巳朔日有食之雲陰不見戊申金主阿骨打卒弟吳乞買立九月辛酉大饗明堂冬十月乙酉兩木冰

十一月乙卯以鄭紳為太師丙寅諸路漕臣坐闕上供
貶秩者二十二丁卯華原郡王朴卒是月金人取平
州張覺走燕山金人索之急命王安中縊殺函首送之
十二月乙巳金人遣使來賀正旦戊申子棣進對徐王
是歲秦鳳旱河南京東淮南饑振之

六年春正月戊寅遣連南夫弔祭金國二月丁亥子栲
進封河間郡王己亥躬耕籍田三月己酉朔金人來索
趙良嗣所許糧二十萬石不與閏月辛巳皇后親蠶夏
四月丁巳尚書左丞李邦彥遭喪起復六月壬子詔以
收復燕雲以來京東兩河之民困於調度令諸路並納

免夫錢秋七月甲辰置璣衡所八月乙卯譚稹罷宣撫
使以童貫領樞密院代之壬戌以復燕雲赦天下九月
乙亥以白時中為特進太宰兼門下侍郎李邦彥為少
宰兼中書侍郎辛巳大饗明堂丁亥以趙野為尚書左
丞宇文粹中為尚書右丞蔡懋同知樞密院事冬十月
庚午詔有收藏習用蘇黃之文者並令焚毀十一月丙
子太宰王黼致仕是月以帑藏空竭罷應奉司令尚書
省置講議財利司十二月癸亥蔡京落致仕領三省事
是歲河北山東盜起命內侍梁方平討之京師河東陝
西地大震兩河京東西浙西水環慶邠寧涇原民流徙

今所在振恤夏國高麗于闐羅殿來貢
七年春二月己酉雨木冰三月丙戌子煥進封建安郡
王夏四月庚申蔡京勒致仕戊辰詔復元豐官制三公
不領三省事六月辛丑詔宗室復著姓丙午封童貫為
廣陽郡王秋七月庚午詔士庶毋以天玉君聖為名字
及以壬戌日輔臣焚香甲戌子梈進封沂王是月熙河
河東路地震九月辛巳大饗明堂壬辰金人以擒遼主
延禧來告慶遼於是亡是月有狐升御榻而坐冬十一
月丙戌祀昊天上帝于圜丘赦天下庚寅以金將幹離
不粘罕分道入寇召种師道為河東河北路制置使十

二月乙巳童貫自太原逃歸己酉金兵至燕山郭藥師
降圍太原府太常少卿傅察奉使不屈死之北邊諸郡
皆陷丙辰金兵犯中山府罷諸路花石綱延福宮西城
租課及內外製造局戊午以皇太子桓為開封牧己未
下詔罪已令中外直言極諫郡邑率師勤王募草澤異
才能出奇計及使疆外者罷道官罷大晟府行幸局庚
申詔內禪以吳敏為門下侍郎明日皇太子即位尊帝
為教主道君太上皇帝居龍德宮尊皇后為道君太上
皇后帝在位二十六年靖康二年二月金將脅帝與欽
宗北去紹興五年四月崩于五國城年五十四七年正

月凶問至，遙上尊謚曰聖文仁德顯孝皇帝，廟號徽宗。十二年八月，梓宮還臨安。十三年加今謚。

論曰：古之帝王，卑宮菲食，不敢縱於民上者，豈故自苦其身，以天下為桎梏哉？蓋昭德塞違，為久安長治計也。何宋徽宗不鑒僻王亡轍，狎佞諛而崇詭誕，飾遊觀而窮侈靡，君臣逸豫，自謂樂且未央，豈虞身陷沙漠而荆棘生殿廷也？且帝嗣立，何如時耶？熙豐紛更之弊已深，紹聖因仍之蠱未飭，譬猶積疴在躬，而嗜欲不節，必無幸矣。禁青榻孤亡，徵先見，天厭昏德，不亦章章乎？

宋史新編卷七

宋史新編卷八

本紀八

明南京戶部主事莆田柯維騏編

欽宗

欽宗，恭文順德仁孝皇帝，諱桓，徽宗長子也。母曰恭顯皇后王氏。元符三年四月十三日，生帝于宮中，初名亶。封韓國公。明年進開府儀同三司，封京兆郡王。崇寧元年，更名烜，又改今名。大觀二年，進封定王。政和三年，加太保。五年二月，立為皇太子。宣和七年十二月，戊午，除開封牧。庚申，徽宗內禪，辛酉，帝即位。壬戌，大赦，立朱氏為皇后。以耿南仲簽書樞密院事。甲子，金將幹離不陷。

信德府粘罕圍太原詔京東淮西兩浙募兵入衛太學
生陳東上書數蔡京董貫王黼梁師成李彥朱勔罪謂
之六賊請誅之丙寅上太上皇帝及太上皇后尊號
靖康元年春正月丁卯朔受羣臣朝退詣龍德宮賀道
君皇帝詔中外臣庶實封言闕政戊辰金人破濬州威
武軍節度使梁方平師潰兩河副制置使何灌退保滑
州己巳灌奔還金人濟河詔親征道君皇帝東幸以蔡
攸為行宮使宇文粹中副之詔自今除授黜陟及恩數
等事兼參酌祖宗舊制罷內外官司局所一百五處以
吳敏知樞密院事李棨同知樞密院事貶王黼安置永

州賜李彥死並籍其家放朱勔歸田里黼至雍丘盜殺
之庚午道君皇帝如亳州百官多潛遁宰相欲奉帝出
襄鄧留守李綱諫止之以綱為尚書右丞辛未以李綱
為親征行營使太宰白時中罷以李邦彥為太宰兼門
下侍郎張邦昌為少宰兼中書侍郎趙野為門下侍郎
王孝迪為中書侍郎蔡懋為尚書左丞癸酉金人犯京
師軍于城西北是夜金人攻宣澤門李綱禦之斬獲百
餘人甲戌金遣使來議和以唐恪耿南仲並同知樞密
院事乙亥金人攻景陽等門李綱督戰竟日斬首數千
級何灌戰死李棨使金軍是日與金使來索金帛數千

萬且求割太原中山河間三鎮并宰相親王爲質乃退
師丙子括借金銀籍倡優家財庚辰命張邦昌副康王
構使金軍詔稱金國加大字辛巳道君皇帝如鎮江以
路允迪簽書樞密院事壬午封子諶爲永寧郡王丁亥
兩河制置使种師道督涇原秦鳳兵入援以師道同知
樞密院事統四方勤王兵及前後軍乙未敗梁師成爲
昭化軍節度副使賜死於途二月丁酉朔命都總制姚
平仲將兵夜襲金軍不克而奔戊戌罷李綱以謝金人
金人復來議和辛丑命宇文虛中等許割三鎮地太學
諸生陳東等及都民數萬人伏闕上書請復用李綱及

种師道乃復綱尚書右丞充京城防禦使語在綱傳壬
寅除元祐黨籍學術之禁廢苑囿宮觀可以與民者金
人復遣使來癸卯命肅王樞使金軍更康王歸以徐處
仁爲中書侍郎宇文虛中簽書樞密院事蔡懋罷知大
名府王孝迪罷提舉醴泉觀乙巳金人來告辭遂退師
京師解嚴戊申赦天下詔自今遵用祖宗舊制凡蠹國
害民事一切寢罷己酉罷宰執兼神霄玉清萬壽宮使
及殿中監符寶郎庚戌李邦彥罷爲中太乙宮使以張
邦昌爲太宰兼門下侍郎吳敏爲少宰兼中書侍郎李
綱知樞密院事耿南仲爲尚書左丞李稅爲尚書右丞

辛亥宇文粹中罷知江寧府癸丑种師道罷為中太乙
宮使甲寅貶蔡京為祕書監分司南京童貫為左衛上
將軍池州居住蔡攸為太中大夫提舉亳州明道宮先
是粘罕遣人來求賂大臣以勤王兵大集拘其使人且
結約余覩以圖之至是粘罕怒分兵趣京師乙卯陷隆
德府知府張確通判趙伯臻等死之辛酉梁方平坐棄
河津伏誅王孝迪罷為醴泉觀使三月戊辰李昫罷為
鴻慶宮使己巳張邦昌罷為中太乙宮使以徐處仁為
大宰兼門下侍郎唐恪為中書侍郎何臬為尚書右丞
許翰同知樞密院事庚午宇文虛中罷知青州壬午詔

金人叛盟深入其元主和議李邦彥奉使許地李昫李
鄴鄭望之悉行罷黜又詔种師道姚古种師中往援三
鎮庚寅姚古復隆德府辛卯復威勝軍甲午籍朱勔家
丙申再貶蔡京為崇信軍節度副使夏四月戊戌夏人
犯鎮威城攝知城事朱昭死之己亥迎太上皇帝入都
門壬寅朝于龍德宮癸卯立子諶為皇太子以耿南仲
為門下侍郎乙巳置春秋博士己酉以生日為乾龍節
庚戌趙野罷知襄陽府癸丑貶童貫為昭化軍節度副
使安置郴州詔開經筵令吏部稽考庶官凡由楊戩李
彥之公田王黼朱勔之應奉童貫西北之師孟昌齡河

防之役夔蜀湖南之開疆關陝河東之改幣及近習所引獻頌可采特赴殿試之流所得爵賞悉奪之甲寅復以种師道同知樞密院事充兩河宣撫使戊午進對弟棊和玉榛信玉己未復以詩賦取士禁用老莊及王安石字說壬戌追政和以來道官處士先生封贈奏補等敕書乙丑再貶蔡攸節度副使安置朱勔于循州五月丙寅朔朝于龍德宮戊辰以國子祭酒楊時言罷王安石配享孔廟降從祀時隨罷丁丑河東制置使姚古將兵至威勝聞粘罕將至衆驚潰河東大振制置副使种師中與金人戰于榆次死之六月丙申朔詔諫官極論

闕失戊戌詔舉將才時太原圍急群臣欲割三鎮地李綱沮之乃以李綱代种師道爲宣撫使授太原辛丑以劉韜爲宣撫副使壬寅封弟樞安康郡王捷廣平郡王詔今日政令惟遵奉上皇詔書脩復祖宗故事群臣庶士亦當講孔孟之正道蔡王安石舊說之不當者羽翼朕志以濟中興甲辰路允迪罷提舉醴泉觀壬戌彗出紫微垣貶姚古爲節度副使安置廣州秋七月乙丑朔除元符上書邪等之禁乙亥安置蔡京于儋州蔡攸雷州童貫吉陽軍乙酉詔蔡京子孫二十三人已分竄遠地遇赦不許量移是日京死于潭州丁亥令改脩宣仁

身史系卷八
謗史辛卯誅童貫趙良嗣竝竄其子孫于海南八月丙申復命种師道以宣撫使巡邊召李綱還丁未幹離不犯真定巳酉金人乘勝攻太原乙卯劉岑李若水分使金軍議和戊午許翰罷知亳州巳未徐處仁罷知東平吳敏罷知揚州以唐恪爲少宰兼中書侍郎何桌爲中書侍郎陳過庭爲尚書右丞聶昌同知樞密院事李回簽書樞密院事庚申遣王雲使金軍許以三鎮賦稅九月丙寅金人犯太原安撫使張孝經副都總管王粟等皆死之辛未貶吳敏安置涪州移蔡攸于萬安軍攸尋與弟脩及朱勔皆賜死丁丑以王寓爲尚書左丞戊寅

李綱罷知揚州壬午梟童貫首于都市癸未賜布衣尹焞爲和靖處士庚寅置四道都總管以趙野王襄張叔夜胡直孺領之罷李綱提舉洞霄宮辛卯遣給事中黃諤由海道使金議和隨罷西南勤王兵是月夏人陷西安州冬十月癸巳朔貶李綱安置建昌軍丁酉金人陷真定都鈐轄劉翊死之戊戌金人使楊天吉王汭來庚子金人陷汾州知州張克戩兵馬都監賈亶死之又攻平定軍辛丑下哀痛詔丙午議割三鎮召种師道還丁未以馮澥知樞密院事乙卯雨木冰丙辰金人陷平陽府又陷威勝隆德澤州辛酉同知樞密院种師道卒十

宋史卷八
六月
一月丙寅夏人陷懷德軍知軍事劉銓通判杜翊世死
之籍譚稹家戊辰馮解罷爲太子賓客癸酉金人至河
外宣撫副使折彥質領師十二萬拒之甲戌師潰金人
濟河知河陽燕瑛西京留守王襄棄城遁乙亥命刑部
尚書王雲副康王使幹離不軍許割三鎮奉袞冕車輅
尊其主爲皇伯且上尊號十八字丙子金人渡河折彥
質兵盡潰提刑許高兵潰于洛口金人來言欲盡得河
北地京師戒嚴遣馮解李若水使粘罕軍丁丑何桌罷
爲醴泉觀使以陳過庭爲中書侍郎孫傳爲尚書右丞
命郭京領選六甲正兵所李回以萬騎防河衆潰而歸

是日塞京城門壬午命耿南仲使幹離不軍聶昌使粘
罕軍許畫河爲界康王至磁州磁人以王雲將挾帝入
金遂殺雲止至勿行王復還相州聶昌行至絳亦爲絳
人所殺南仲奔相州甲申以孫傳同知樞密院事曹輔
簽書樞密院事以范致虛爲陝西五路宣撫使令督勤
王兵入援乙酉幹離不軍至城下丁亥李回罷提舉萬
壽觀己丑南道總管張叔夜將兵勤王幹離不遣劉晏
來庚寅詔三省官名悉依元豐舊制以何桌爲門下侍
郎閏月壬辰唐恪罷爲中太乙宮使以何桌爲尚書左
僕射兼中書侍郎癸巳粘罕軍至城下甲午驛召李綱

爲資政殿大學士領開封府金人陷懷州霍安國林淵
及其鈐轄張彭年等皆死之乙未金人入青城攻朝陽
門馮澥與金人蕭慶楊真誥來丁酉以馮澥爲尚書左
丞統制高師旦與金人戰于城下死之庚子以張叔夜
簽書樞密院事金人攻宣化門姚仲友禦之辛丑金人
攻南壁殺傷相當癸卯金人復攻南壁張叔夜范瓊分
兵襲之遙見金兵奔還自相蹈藉溺淖死者以千數甲
辰大雨雪遣間使召諸道兵勤王乙巳大寒士卒噤戰
不能執兵有僵仆者帝在禁中徒跣祈晴時勤王兵不
至城中惟衛士三萬然亦十失五六金人攻城急丙午

雨木冰已酉遣馮澥曹輔及宗室仲溫士誦使金軍請
和命康王爲天下兵馬大元帥領兵入衛辛亥金人來
議和要親王出盟壬子金人攻通津宣化門范瓊以千
人出戰渡河冰裂沒者過半自是士氣益挫甲寅大風
自北起俄大雨雪連日夜不止乙卯金人復使劉晏來
趣親王宰相出盟丙辰妖人郭京大啓宣化門出攻金
人兵大敗京下城遁金兵登城衆皆披靡金人焚南薰
諸門統制何慶言陳克禮中書舍人高振力戰與其家
人皆被害姚仲友死于亂兵秦元領保甲斬關遁京城
陷衛士入都亭驛執劉晏殺之戊午金人邀上皇出郊

帝曰上皇驚憂而疾朕當親往自乙卯雪不止是日霽
夜有白氣出太微彗星見庚申日赤如火無光辛酉帝
如青城十二月壬戌朔帝在青城癸亥帝至自青城甲
子大索金帛丙寅遣陳遼庭劉韜使兩河割地是時以
金人議和詔止康王兵事具高宗紀

二年春正月辛卯朔命濟王栩景王杻出賀金軍金人
亦遣使入賀壬辰金人趣召康王還甲午詔兩河民開
門出降丁酉雨木冰庚子金人需索急何桌李若水勸
帝再至金營以太子監國而行乙巳籍梁師成家丙午
劉韜自經于金軍帝爲金人所留太學生徐揆上書乞

守門請帝還闕金人取至軍中揆抗論爲所殺二月辛
酉朔帝在青城丙寅金人塹南薰門路人心大恐巳而
金人令翰林承旨吳玠吏部尚書莫儔入城推立異姓
且要上皇如青城京城巡檢范瓊逼上皇與太后御犢
車出宮金又以內侍鄧述所具諸王孫名檄開封尹徐
秉哲盡取入軍中吏部侍郎李若水死之辛未金人逼
上皇召皇后皇太子入青城癸未留守王時雍等署狀
立張邦昌唐恪仰藥而死金人執孫傳張叔夜及御史
中丞秦檜乙酉金人以括金未足殺尚書梅執禮侍郎
陳知質程振給事中安扶三月辛卯朔帝在青城丁酉

金人立張邦昌爲楚帝，閣門宣贊舍人吳革率衆討邦昌，死之。丁巳，金帥幹離不脅上皇及太后與親王皇孫駙馬公主妃嬪由滑州北去。夏四月庚申朔，大風吹石折木，金帥粘罕以帝及皇后皇太子妃嬪宗室由鄭州北去。凡法駕鹵簿禮器樂器祭器八寶九鼎圭璧渾天儀銅人刻漏古器太清樓祕閣三館書天下州府圖及內侍技藝工匠娼優府庫蓄積爲之一空。康王卽位，遙上帝尊號曰孝慈淵聖皇帝。紹興三十一年崩于五國城。年六十二。訃聞，上尊謚廟號欽宗。

論曰：靖康之禍，豈忍言哉！始由蔡京王黼童貫輩之啓

釁，終由唐恪李邦彥耿南仲輩之請和。自古未有姦佞盈朝而不致亂者，亦未有闕冗在位而能濟事者。要之臣主俱僻，宣政之亂勢已成。藉使欽宗與諸臣有剛斷之才，安施乎抑春秋之法，國君死社稷，正也。避難而圖興復，義猶未絕也。帝父子竝爲囚虜，何以追斯責哉！

宋史新編卷八

宋史新編卷九

本紀九

高宗上

明南京戶部主事莆田柯維騏編

高宗受命中興全功至德聖神武文昭仁憲孝皇帝諱
 構字德基徽宗第九子也母賢妃韋氏是為顯仁皇后
 大觀元年五月二十一日生帝于東京大內八月授定
 武軍節度使檢校太尉封蜀國公二年封廣平郡王為
 開府儀同三司政和三年進太保宣和三年封康王資
 性朗悟博學彊記日誦千餘言挽弓至一石五斗靖康
 元年正月金人犯京師邀親王宰臣議和軍中欽宗召

宋史新編卷九
帝諭指慷慨請行遂命少宰張邦昌與帝俱金帥幹離
不留之旬日帝意氣閒暇二月會姚平仲夜襲金營金
人見責邦昌恐懼涕泣帝不為動幹離不疑其非親王
更請肅王帝得還八月金人分兵復陷太原真定須帝
再至乃議和十一月帝被命即發京師為磁人所沮汪
伯彥以蠟書請帝還相州事具欽宗紀閏月帝同耿南
仲募兵勤王欽宗遣人持蠟詔至相拜帝為河北兵馬
大元帥陳亨伯為元帥汪伯彥宗澤副之十二月壬戌
朔帝開大元帥府乙亥帝率兵離相州丁丑次大名府
宗澤梁楊祖各以兵數千至張俊苗傅楊沂中田師中

皆在麾下兵威稍振會密詔金人議和可屯兵近甸毋
輕動宗澤請直趨澶淵帝用汪伯彥等議趨東平
建炎元年春二月庚辰帝如濟州三月丁酉金人立張
邦昌為帝尋挾徽宗欽宗北去事具欽宗紀夏四月癸
亥張邦昌尊哲宗廢后孟氏為宋太后遣人訪帝于濟
州丁卯謝克家以大宋受命之寶至濟州宗澤來言南
京乃藝祖興王之地取四方中漕運尤易遂決意趨應
天是夕張邦昌手書上延福宮太后尊號曰元祐皇后
入居禁中自是垂簾聽政甲戌皇后手書告中外曰比
以敵國興師都城失守禮纏宮闕既二帝之蒙塵誣及

宗祊謂三靈之改卜，眾恐中原之無統，姑令舊弼以臨朝，雖義形於色，而以死爲辭，然事迫於危，而非權莫濟，內以振黔首將亡之命，外以紓鄰國見逼之威，遂成九廟之安坐，免一城之酷，乃以衰癯之質，起於閒廢之中，迎置宮闈，進加位號，舉欽聖已還之典，成靖康欲復之心，未言運數之屯，坐視邦家之覆，撫躬獨在，流涕何從，緬惟藝祖之開基，實自高穹之眷命，歷年二百，人不知兵，傳序九君，世無失德，雖舉族有北轅之釁，而敷天同左袒之心，乃眷賢王，越居近服，已徇羣情之請，俾膺神器之歸，繇康邸之舊藩，嗣宋朝之大統，漢家之厄，十世

宜光武之中興，獻公之子九人，惟重耳之尚在，茲爲天意，夫豈人謀，尚期中外之協心，同定安危之至計，庶臻小惕，用底不平，爰敷告於多方，其深明於吾意矣。未帝至，應天府乙酉，張邦昌至，伏地慟哭，請死。帝慰撫之，王時雍等奉乘輿，服御至，羣臣勸進者益衆，命築壇，府門之左。五月庚寅朔，帝登壇受命，禮畢，慟哭，遙謝。二帝卽位于府治，改元建炎。大赦，張邦昌及應干供奉金國之人，一切不問。中外臣庶，許直言，雖詆訐，亦不加罪。蔡京、童貫、朱勔、李彥、孟昌齡、梁師成、譚稹及其子孫，更不收敘。內外大臣，限十日各舉布衣有材略者一人，以黃潛

善爲中書侍郎汪伯彥同知樞密院事元祐皇后在東京是日撤簾辛卯遙尊乾龍皇帝爲孝慈淵聖皇帝尊元祐皇后爲元祐太后詔史官辨宣仁聖列皇后誣謗壬辰張邦昌封同安郡王癸巳遙尊母賢妃韋氏爲宣和皇后遙立嘉國夫人邢氏爲皇后耿南仲罷提舉洞霄宮甲午以李綱爲尚書右僕射兼中書侍郎趣赴行在乙未以生日爲天申節馮解罷知潼川府以呂好問爲尚書右丞命統制馬忠張換率兵趣河間追襲金人丁酉貶王時雍黃州安置己亥召太學生陳東赴行在庚子論靖康大臣誤國罪李邦彥吳敏蔡懋李棡宇文

虛中鄭望之李鄴竝貶遠州安置丙午以誣謗宣仁聖烈皇后追貶蔡確蔡卞邢恕蔡懋官以姚古知河南府金人陷河中府權府事郝仲連死之庚戌以宗澤知襄陽府丙辰罷監察御史張所尋責江州安置是月置御營司命黃潛善兼御營使汪伯彥副之以王淵爲都統制劉光世提舉一行事務韓世忠爲左軍統制張俊爲前軍統制楊惟忠主管殿前公事西道總管王襄北道總管趙野坐勤王稽緩連貶襄永州安置野邵州安置簽書樞密院事張叔夜從徽宗北遷至界河死之六月己未朔李綱至行在獻十議辛酉貶徐秉哲梅州安置

癸亥以黃潛善爲門下侍郎張邦昌坐僭逆貶潭州安置及受僞命臣僚王時雍吳玠莫儔孫覲李擢竝遠州安置顏博文王紹以下論罪有差甲子命李綱兼御營使賊李孝忠陷夔陽辛未以子塹生大赦還元祐黨籍及元符上書人恩數戊寅以汪伯彥知樞密院事遣傅粲使金軍通問二帝己卯置沿河沿淮沿江帥府別置水軍七十七將壬午以張慤同知樞密院事兼提舉措置戶部財用癸未呂好問罷知宣州乙酉以宗澤爲東京留守丙戌詔陝西河北京東西路募兵十萬人更番入衛行在丁亥以張所爲河北西路招撫使括買官民

馬勸出財助國戊子以錢蓋爲陝西經制使秋七月己丑以王瓌爲河東經制使庚寅詔王淵劉光世張俊喬仲福韓世忠分討陳州軍賊杜用京東賊李昱及黎驛魚臺潰兵皆平之辛丑復議吳玠莫儔等十一人罪遠竄之壬寅詔奉元祐太后如東南六宮及衛士家屬從行朕當留中原與金人決戰以許翰爲尚書右丞甲辰諫議大夫宋齊愈坐立張邦昌斬都市丙午以范致虛知鄧州脩城池繕宮室儲錢穀以備巡幸丙辰上皇自燕山密遣閣門宣贊舍人曹勳至賜帝絹半臂書其頰曰便可卽真來援父母帝泣以示輔臣是月關中盜史

宋史新編卷九
五
斌犯興州僭稱帝八月戊午軍校陳通作亂于杭州壬戌以李綱爲尚書左僕射兼門下侍郎黃潛善爲尚書右僕射兼中書侍郎庚午更號元祐太后爲隆祐太后辛未召河東經制副使傅亮還行在壬申召布衣譙定赴行在癸酉耿南仲坐主和誤國貶南雄州安置乙亥用張浚言罷李綱提舉洞霄宮壬午用黃潛善言殺上書太學生陳東布衣歐陽澈乙酉許翰罷提舉洞霄宮九月壬辰詔曰祖宗都汴垂二百年比年以來圖慮弗臧禍生所忽肆朕纂承顧瞻宮室何以爲懷是用權時之宜法古巡狩駐蹕近甸號召軍馬朕將親督六師以

援京城及河北河東諸路與之決戰歸宅故都迎還二聖以稱朕夙夜憂勤之意庚子金人徙二帝居霄郡壬寅以王圭代張所尋貶所廣南安置戊申都統制王彥渡河擊金人破之復新興縣壬子張邦昌賜死併誅王時雍乙卯王彥及金人戰敗績奔太行山其裨將岳飛引部曲自爲一軍是秋建州軍校張員等作亂軍賊趙萬陷常州又陷鎮江府金人分兵據兩河州縣冬十月丁巳朔帝登舟幸淮甸先是宗澤屢疏請還京爲黃潛善汪伯彥所沮至是復疏請不聽己卯次楚州寶應縣後軍將孫琦作亂丙戌王淵張俊誘趙萬等悉誅之十

一月戊子，貶李綱鄂州居住。真定軍賊張遇陷池州。壬辰，遣王倫等為金國通問使。丙午，以張慤為中書侍郎。戊申，以顏岐為尚書左丞，許景衡為尚書右丞，郭三益同知樞密院事。十二月辛酉，王淵入杭州，執陳通誅之。壬戌，青州敗將王定作亂，殺帥臣曾孝序。甲戌，金人聞帝幸揚州，分兵南侵犯同州。守臣鄭驤死之。己卯，金人陷汝州。入西京。庚辰，金人陷華州。辛巳，金人破潼關。經制使王瓌引兵遁入蜀。是冬，軍賊丁進犯壽春府。已而詣宗澤降。

二年春正月丙戌朔，帝在揚州。戊子，金人陷鄧州。安撫

使劉汲死之。京西州郡皆陷。乙未，金人破宋興軍。前河東經制副使傅亮以兵降。經略使唐重等死之。東平府兵馬鈐轄孔彥舟叛，渡淮犯黃州。辛丑，貶內侍邵成章。南雄州編管金人犯鄭州。通判趙伯振死之。辛亥，王淵招降張遇，以所部萬人隸韓世忠。是月，金人陷潁昌府。殺守臣孫默。二月丙辰，金人再犯東京。宗澤遣將閻中立拒之，戰死。甲子，金人犯滑州。宗澤遣將張撝援之，戰死。乙丑，河北賊楊進等詣宗澤降。已而澤復諭降河東賊王善，未幾俱叛。癸酉，金人陷蔡州。執守臣閻孝忠。丙子，金人陷淮寧府。守臣向子韶死之。丁丑，遣王貺等充

宋史新編卷之
金國軍前通問使三月辛卯金人陷中山府丁酉金帥
黏罕焚西京去庚子河南統制翟進復西京是月金人
犯鳳翔府又犯涇原經略使曲端遣將吳玠擊敗之夏
四月丙辰詔文臣從官至牧守武臣管軍至遙郡各舉
所知二人戊午宗澤遣將趙世興復滑州庚申帝諭輔
臣曰故事自五月至八月罷講筵朕以寡昧履茲艱難
方夙夜孜孜於經史若如故事則累月當廢疑義無所
質朕欲勿罷可乎羣臣皆稱善於是詔勿罷經筵乙丑
金帥兀室復入西京尋棄去隴右都護張巖及金人戰
于五里坡敗績死之五月乙酉許景衡罷提舉洞霄宮

丙戌命叅酌元祐科舉條制立詩賦經義分試法語在
選舉志戊子以朱勝非爲尚書右丞辛卯以金兵渡河
遣韓世忠宗澤等逆戰丙申復命宇文虛中充金國祈
請使虛中降金癸卯中書侍郎張慤卒甲辰金帥婁宿
陷絳州己酉秀州卒徐明等作亂命張俊討平之因殺
前秀州守趙叔近是月以知延安府王庶節制陝西六
路軍馬涇原經略使曲端爲節制司都統制秋七月丙
戌東京留守宗澤卒辛丑以春霖夏旱蝗詔監司郡守
條上闕政州郡災甚者蠲田賦甲辰以杜充爲東京留
守八月甲寅初鑄御寶三甲戌殿中侍御史馬伸言黃

潛善汪伯彥罪詔罷伸尋貶監濮州酒稅河北京東捉殺使李成叛犯宿州是月金人徙二帝居韓州九月癸巳金人犯冀州將官李政死之甲午金人再犯永興軍辛丑陝西節制司兵官賀師範及金人戰于八公原死之丁未東京留守統制官薛廣及金人戰于相州死之巳酉同知樞密院事郭三益卒冬十月甲子命孟忠厚奉隆祐太后幸杭州是月翟進擊楊進于鳴臯山戰死劉正彥擊丁進降之十一月辛巳朔貶李綱萬安軍安置壬辰金人陷延安府通判魏彥明死之乙未金人陷濮州執守臣楊粹中不屈而死又陷開德府守臣王棣

死之以魏行可充金國軍前通問使壬寅冬至祀昊天上帝于圜丘以太祖配大赦金人陷相州守臣趙不試死之甲辰陷德州兵馬都監趙叔皎死之是月金人陷晉寧軍守臣徐徽言拒却之知府州折可求以城降濱州賊蓋進陷棣州守臣姜剛之死之建州賊葉濃降復謀為變張俊禽斬之吳玠襲誅史斌王淵殲京東降賊李民之衆留民為將十二月庚申金人陷東平府又陷濟南府守臣劉豫以城降甲子金人陷大名府提點刑獄郭永罵敵死之丙寅初命脩國史巳巳以黃潛善為尚書左僕射兼門下侍郎汪伯彥為尚書右僕射兼中

書侍郎顏岐門下侍郎朱勝非中書侍郎盧益同知樞密院事戊寅以禮部侍郎張浚兼御營參贊軍事是冬高麗遣使尹彥頤來報聘且謝過語在高麗傳是年工部侍郎兼侍講楊時罷提舉洞霄宮

三年春正月庚辰朔帝在揚州甲申以路允迪簽書樞密院事辛卯都統制邵興復虢州庚子張用王善寇淮寧府守臣馮長寧却之丙午金帥粘罕陷徐州守臣王復死之韓世忠軍潰于沐陽其將張遇戰死金兵執淮陽守臣李寬殺轉運使李跋以騎兵三千取彭城間道趨淮甸二月庚戌朔聽士民從便避兵劉正彥部兵衛

皇子六宮如杭州壬子帝被甲馳幸鎮江是日金兵過揚子橋帝自貶大號致書金帥請存趙氏宗社粘罕荅書招使降於是撻懶兀朮拔离速等分道南侵癸丑游騎至瓜州禮官奉九廟神主行王淵請幸杭州以呂頤浩為江淮制置使劉光世充行在五軍制置使駐鎮江府楊惟忠節制江東軍馬駐江寧府是夕發鎮江次呂城鎮丙辰次平江府兀朮追弗及乃還戊午次吳江縣命朱勝非節制平江府秀州控扼軍馬張浚副之又命勝非兼御營副使留王淵守平江用勝非計錄用張邦昌親屬謝金人庚申呂頤浩拜同簽書樞密院事屯京

口命張俊守吳江壬戌駐蹕杭州卽州治爲行宮金人陷晉寧軍守臣徐徽言死之癸亥下詔罪已乙丑放還士大夫被竄斥者惟李綱罪在不赦更不放還蓋用黃潛善計以謝金人戊辰金人焚揚州而去己巳黃潛善汪伯彥竝以罪罷潛善知江寧府伯彥知杭州府以葉夢得爲尚書左丞張洙爲尚書右丞未幾夢得罷呂頤浩遣將陳彥復揚州三月己卯日中有黑子庚辰以朱勝非爲尚書右僕射兼中書侍郎以王淵同簽書樞密院事以呂頤浩爲江南東路安撫制置使知江寧府時扈從統制苗傅忿王淵驟得君劉正彥怨招降羣盜而

賞功薄帝在揚州闈宦用事恣橫諸將多疾之乃是月癸未傅正彥叛勒兵向闕殺王淵及內侍康履以下百餘人迫帝遜位于皇子請隆祐太后臨朝是夕帝移御顯寧寺甲申尊帝爲睿聖仁孝皇帝以顯寧寺爲睿聖宮大赦丁亥分竄內侍藍珪曾擇等于遠州苗傅追擇還殺之戊子以王孝迪爲中書侍郎盧益爲尚書左丞張浚呂頤浩及張俊劉光世韓世忠會兵勤王己丑改元明受張浚奏乞睿聖皇帝親總要務庚寅百官始朝睿聖宮苗傅等以御營中軍統制吳湛主管步軍司黃潛善汪伯彥竝分司衡水州居住呂頤浩奏請睿聖皇

身親錄卷九
帝復尊位壬寅盧益罷癸卯呂頤浩張浚傳檄中外討
傅正彥丁未呂頤浩張浚次吳江復奏請建炎皇帝還
卽尊位朱勝非召傅正彥至都堂議復辟傅等遂朝睿
聖宮是月盜邵青掠泗州金人陷京東諸郡撻懶以劉
豫知東平府節制河南州郡趙立復徐州夏四月戊申
朔太后下詔還政皇帝復尊位帝還宮與太后御前殿
垂簾詔尊太后爲隆祐皇太后庚戌復紀年建炎命張
浚知樞密院事苗傅劉正彥並檢校少保呂頤浩張浚
敗賊將苗翊馬柔吉于臨平傅正彥引兵夜遁辛亥皇
太后撤簾呂頤浩等入見癸丑右相朱勝非及執政顏

岐王孝迪張澂路允迪俱罷以呂頤浩爲尚書右僕射
兼中書侍郎李邴爲尚書右丞鄭穀簽書樞密院事甲
寅劉光世韓世忠張俊及勤王所僚屬將佐進秩有差
斬中軍統制吳湛工部侍郎王世脩于市乙卯大赦舉
行仁宗法度應嘉祐條制與今不同者自官制役法外
賞格從重條約從寬罷上供不急之物元祐石刻黨人
官職恩數追復未盡者令其家自陳許中外直言丁巳
禁內侍交通主兵官及干預朝政庚申重正三省官名
左右僕射並帶同中書門下平章事改門下中書侍郎
爲參知政事省尚書左右丞併省館學寺監等官以李

邴參知政事丁卯帝發杭州留鄭穀衛皇太后壬申立
子專爲皇太子是月劉文舜寇濠州西北賊薛慶據高
郵軍五月戊寅朔帝次常州以張浚爲宣撫處置使以
川峽京西湖南北路隸之聽便宜黜陟辛巳次鎮江府
癸未以滕康同簽書樞密院事乙酉至江寧府改府名
建康起復朝散郎洪皓爲金國通問使金人拘之丁亥
召內侍藍珪等速還朝辛丑張浚諭降薛慶于高郵還
復命知樞密院事是月韓世忠追獲劉正彥苗傅送行
在翟興擊殺楊進其黨復推劉可拒官軍六月己酉以
久雨求直言庚申皇太后至建康府辛酉以久陰下詔

以四失罪已一曰昧經邦之大略二曰昧戡難之遠圖
三曰無綏入之德四曰失馭臣之柄仍榜朝堂遍諭天
下使知朕悔過之意丁卯右司諫袁植請誅黃潛善及
失守者權邦彥等九人詔朕方念咎責已豈可盡以過
失歸於臣下植雖敢言然導朕殺人此非美事遂罷植
知池州以趙鼎代之乙亥京西賊貴仲正降是月金人
大舉入寇陷磁州秋七月辛巳苗傅劉正彥伏誅甲申
詔以苗劉之變當軸大臣不能身衛社稷朱勝非顏岐
路允迪並落職張浚衡州居住丁亥皇太子專薨戊子
簽書樞密院事鄭穀卒己丑以王綯參知政事周望同

宋史紀事本末卷九
簽書樞密院事辛卯帝將定都杭州升爲臨安府壬辰
御營司提舉范瓊坐靖康助逆賜死子弟皆流嶺南乙
未遣謝亮使夏國丁酉遣崔縱使金軍前壬寅命李邴
滕康權知三省樞密院事扈從太后如洪州以杜充同
知樞密院事乙巳山東盜郭仲威陷淮陽軍八月庚戌
李邴罷壬子以劉珪權同知三省樞密院事丁卯遣杜
時亮使金軍前閏月己丑以呂頤浩爲尚書左僕射杜
充爲尚書右僕射並同中書門下平章事庚寅起居郎
胡寅上書言二十事呂頤浩不悅罷之辛卯命杜充兼
江淮宣撫使守建康前軍統制王夔隸之韓世忠爲浙

西制置使守鎮江劉光世爲江東宣撫使守太平池州
皆受充節制九月丙午朔日有食之壬子金人陷單州
興仁府遂陷南京癸丑以張守同簽書樞密院事以周
望總兵守平江命劉光世移屯江州丙辰遣張邵充金
國軍前通問使金人囚之張浚承制罷知潭州辛炳起
復直龍圖閣向子諲代之甲戌金帥婁宿犯長安冬十
月癸未帝至臨安復如越州辛卯李成陷滁州殺守臣
向子伋戊戌張浚治兵于興元府以圖中原庚子金人
陷黃州守臣趙令歲死之辛丑金人自黃州濟江劉光
世引軍遁江州陷金人趨洪州是月京西賊劉滿陷信

宋史新編卷九
陽軍殺守臣趙士負十一月戊申金帥兀朮犯和州守
臣李儔以城降鈐轄宋昌祚通判唐璟等死之己酉兀
朮犯無爲軍壬子太后退保虔州丁巳金人犯臨江軍
戊午遣孫悟等充金國軍前致書使金人陷洪州權知
州事李積中以城降撫袁二州守臣王仲山王仲巖皆
降庚申金人陷真州辛酉太后至吉州壬戌金人陷建
康府溧水縣尉潘振死之癸亥金人陷太平州甲子杜
充遣都統制陳淬岳飛等及金人戰于馬家渡王瓊先
遁卒敗績死之乙丑太后如太和縣護衛統制杜彥及
後軍楊世雄率衆叛犯永豐縣知縣事趙訓之死之金

人至太和縣太后自萬安陸行如虔州丁卯詔曰國家
遭金人侵逼無歲無兵朕纂承以來深軫念慮謂父兄
在難而吾民未撫不欲使之陷於鋒鏑故包羞忍恥爲
退避之謀冀其逞志而歸稍得休息自南京移淮甸自
淮甸移建康而會稽播遷之遠極于海隅卑詞厚禮使
介相望以至願去尊稱甘心貶屈請用正朔比於藩臣
遣使哀祈無不曲盡假使金石無情亦當少動累年卑
屈卒未見從生民嗷嗷何時寧息今諸路之兵聚於江
浙之間朕不憚親行據其要害如金人尚容朕爲汝兵
民之主則朕於事大之禮敢有不恭或必用兵窺我行

在傾我宗社塗炭生靈竭取東西金帛子女則朕亦何
愛一身不臨行陣以踐前言以保羣生朕已取十一月
二十五日移蹕前去浙西爲迎敵計惟我將士人民念
國家涵養之恩二聖拘縻之辱悼殺戮殘焚之禍與其
束手待斃曷若并計合謀同心戮力奮勵而前以存國
家是日金人陷吉州又陷六安軍己巳帝發越州庚午
復還越州以周望同知樞密院事范宗尹參知政事辛
未金人至建康府宣撫使杜充叛降通判楊邦乂不屈
死之帝如明州淮西兵馬都監王宗望以濠州降于金
是月淮賊劉忠入舒州殺通判孫知微盜桑仲自唐州

犯襄陽據之十二月丙子帝至明州丁丑江淮宣撫司
準備將戚方叛犯鎮江府殺守臣胡唐老辛巳金人陷
常州又陷廣德軍守臣周烈死之壬午定議航海避兵
甲申張浚承制拜曲端爲威武大將軍宣撫處置使司
都統制乙酉兀朮犯臨安府守臣康允之棄城遁錢塘
縣令朱蹕死之己丑帝乘樓船次定海縣乙未杜彥珣
潭州殺通判孟彥卿趙民彥金人屠洪州戊戌金人犯
越州安撫使李鄴以城降衛士唐琦死之庚子帝移幸
溫台是歲占城來貢高麗亦來貢詔却其使
四年春正月甲辰朔帝舟居于海丁巳金帥婁宿犯陝

宋史紀事本末卷九
州守臣李彥仙死之己未金人陷明州乘勝破定海以舟師來襲御舟張公裕以大舶擊退之丁卯京西賊劉可敗其黨復推劉超據荆門軍戊辰滕康劉珏罷仍奪職二月甲戌朔河北盜酈瓊率衆詣劉光世降叛將傅選詣處州降乙亥奉安祖宗神御于福州以盧益李回並權知三省樞密院事金人陷潭州將吏王暎劉侏趙聿之戰死守臣向子諲奪門亡去金兵大掠屠其城丁亥金人自臨安引兵北還陷汴京丙申張浚承制以陝西制置使王似知成都府金游騎至平江周望棄軍奔太湖守臣湯野亦遁兀朮入城縱火焚掠死者五十萬

人辛丑鼎州民鍾相作亂自稱楚王陷澧州殺守臣黃宗權湖北制置使傅雲招降孔彥舟以爲湖南北捉殺使三月甲寅遣盧益等奉迎太后于虔州丁巳金帥兀朮至鎮江府韓世忠屯金山寺邀擊之辛酉御舟發溫州御營前軍將楊勅叛甲子張浚請便宜辟官不許衝改戊辰孔彥舟擒鍾相及其子子昂檻送行在誅之己巳戚方陷廣德軍殺通判王儔等夏四月戊寅吳玠及金帥婁室戰于邠州彭原店敗績部將楊晟死之癸未帝還越州甲申下詔親征巡幸浙西韓世忠駐軍楊子江要金人歸路屢敗之兀朮引軍走建康丙申以御史

中丞趙鼎劾奏罷呂頤浩爲醴泉觀使韓世忠及兀朮
再戰江中金人乘風縱火世忠敗績兀朮渡江屯六合
縣己亥以張浚爲浙西江東制置使是月王德破信州
妖賊王宗石又誅劉文舜于饒州諸縣悉平金人犯江
西者聞兀朮北還亦自荆門引去留守司統制牛皐潛
軍寶豐擊敗之五月甲辰以范宗尹爲尚書右僕射兼
御營使壬子金人焚建康府執李稅陳邦光而去淮南
宣撫司統制岳飛邀擊于靜安鎮敗之癸丑詔臺諫等
官各舉所知二人以張守參知政事趙鼎簽書樞密院
事乙卯王絢罷奉祠甲子周望罷奉祠尋分司衡州居

住乙丑置京湖淮南諸路鎮撫使以翟興孟汝趙立劉
位趙霖李成吳翊李彥先薛慶分領之是月淮西敗將
崔增陷焦湖水砦六月辛未朔詔侍從臺諫諸將集議
駐蹕事宜甲戌罷御營司以范宗尹兼知樞密院事庚
辰復置鎮撫使六人以陳規解潛程昌胤陳求道范之
才馮長寧分領之丙戌戚方詣張俊降以郭仲威爲真
揚州鎮撫使乙未郭仲威復叛犯鎮江府是月兀朮聞
張浚在秦州將舉兵北伐自六合引兵趨陝西秋七月
癸卯劉光世援宣撫使例乞便宜行事不許詔軍興以
來諸州得便宜指揮者並罷戊申以孔彥舟爲辰沅靖

州鎮撫使乙卯金人徙二帝居五國城庚申以岳飛為通泰州鎮撫使辛酉建州民范汝為作亂丁卯金人立劉豫為齊帝是月張浚遣將復陝西州軍張用降八月辛未朔以謝克家參知政事壬申李成請降于江州詔撫納之庚辰承州天長保寧鎮撫使薛慶及金人戰于揚州城下死之癸未盧益罷丙戌命李成吳玠捍禦上流翊棄城去戊戌范宗尹請官桑仲以為襄陽等州鎮撫使九月甲辰太上皇后鄭氏崩于五國城戊申劉豫僭位于北京乙卯桑仲陷均房州丙辰金人攻楚州鎮撫使趙立死之丁巳李成復叛遣馬進犯興國軍戊午

荆襄賊趙延壽犯德安府陳規拒却之癸亥張浚遣將劉錫統五路兵及金將婁室戰于富平縣敗績戊辰金人陷楚州鎮撫使李彥先來援兵敗死之冬十月庚午朔張浚以富平兵敗斬環慶經略使趙哲于邠州貶劉錫安置合州命諸將各領兵歸本路浚退保秦州陝西大震辛未秦檜自金將撻懶軍中歸丁亥以李回同知樞密院事是月馮長寧叛以城附劉豫江東賊張琪犯建康府虔州賊李敦仁及弟世雄破石城縣鍾相王善餘黨楊華祝友復作亂十一月癸卯呂頤浩復南康軍甲辰趙鼎罷奉祠丁未以富直柔簽書樞密院事以秦

檜為禮部尚書壬子日南至帝率羣臣遙拜二帝丁巳
王彥攻桑仲于黃水破之房州平張浚承制以王彥為
金均房州鎮撫使是月張浚退軍興州遣吳玠收餘兵
保大散關東和尚原崔增以兵萬餘詣呂頤浩降十二
月甲午金人再陷熙州總管劉惟輔被執死之丁酉范
汝為降未幾復叛是月交趾請入貢却之是年張浚罷
曲端都統制連敗萬州安置量移興州

紹興元年春正月己亥朔帝在越州下詔改元赦帥百
官遙拜二帝自是歲如之戊申以羣盜據湖南命張俊
為江淮路招討使岳飛副之辛亥謝克家罷提舉洞霄

宮辛酉詔太祖創業垂統德被萬世神宗詔封子孫一
人為安定郡王世世勿絕自宣和末至今未舉有司其
上應襲封人名依故事舉行是月張浚量移曲端恭州
居住二月辛巳以秦檜參知政事三月丙午孔彥舟復
叛焚掠潭州趨衡州夏四月庚辰皇太后孟氏崩是月
京西賊李忠陷商州五月戊戌以張用為舒蘄鎮撫使
癸卯作太宋中興寶成金人犯和尚原吳玠擊敗之丙
午初復召試館職之制劉光世遣將王德襲揚州執郭
仲威以獻伏誅壬戌邵青圍太平州劉光世招降之趙
延壽據分寧縣呂頤浩招降之是月張俊及李成戰于

宋史紀事本末卷之九
黃梅縣殺馬進成敗遁歸劉豫張用復叛寇江西岳飛
招降之六月壬午權攢昭慈獻烈子皇后于越州是月
邵青復叛犯江陰軍廣賊鄧慶龔富南安賊吳忠宋破
壇劉洞天竝作亂張浚承制以吳玠為陝西諸路都統
制時關隴六路盡陷止餘階成岷鳳洮五郡鳳翔之和
尚原隴州之方山原粘罕既得陝西地悉與偽齊秋七
月丙午撻懶自宿遷北歸癸亥范宗尹罷提舉洞霄宮
是月虔州賊陳顥作亂八月丙寅以孔彥舟為蘄黃鎮
撫使丁卯張浚殺曲端于茶州獄戊辰參知政事張守
等上紹興重修敕令格式戊寅張守罷提舉洞霄宮以

李回參知政事富直柔同知樞密院事丁亥以秦檜為
尚書右僕射同中書門下平章事兼知樞密院事是月
下詔追贈程頤直龍圖閣其略曰周衰聖人之道不得
其傳世之學者其欲聞仁義道德之說孰從而求之抑
孰從而聽之爾頤潛心大業高明自得之學可信不疑
而浮偽之徒自知學問文采不足表見於世乃竊借名
以自售外示恬默中實奔競使天下之士聞其風而疾
之是重不幸焉朕所以振耀褒顯之者以明上之所與
在此而不在彼也九月辛亥大饗明堂太祖太宗竝配
大赦錄用元符上書人子孫癸丑復以呂頤浩為尚書

左僕射同中書門下平章事兼知樞密院事是秋知鄂州曹成掠湖西犯沅州與知復州李宏合屯瀏陽既而攻宏宏奔潭州冬十月乙丑李回罷知洪州己巳王德復招邵青降之庚午以孟庾參知政事癸酉兀朮攻和尚原吳玠及弟璘力戰大敗之兀朮僅以身免己丑升越州爲紹興府十一月丙申遣內侍撫問孔彥舟桑仲下酉榜諭福建江東羣盜赦其脅從者戊戌詔移蹕臨安以孟庾爲福建江西荆湖宣撫使韓世忠副之辛丑詔續編紹興太常因革禮庚戌富直柔罷提舉洞霄宮十二月戊寅以彗出求直言己丑起復吳玠爲鎮西軍

節度使是歲吳玠始遣人通書夏國淮南京東西饑振流民

二年春正月癸巳朔帝在紹興府甲午詔復賢良方正直言極諫科辛丑韓世忠拔建州范汝爲自焚死餘黨悉平丙午帝至臨安府詔蠲臨安諸縣民逋負罷行在脩造辛酉江西副總管楊惟忠以楊勅雖就招安復謀作亂誘誅之二月甲子降盜楊華復叛擾鼎澧潭三州庚午以李綱爲湖廣宣撫使仍命岳飛等共討曹成諸盜丁丑分崔增李捧邵青趙延壽李振單德忠徐文所部兵爲七將名御前忠銳軍隸步軍司非樞密奉旨不

許調遣是月知商州董先叛入劉豫三月壬辰朔再貶
徐秉哲惠州吳弁南雄州莫儔韶州並居住戊戌以李
光爲江東安撫大使兼滁濠等六州宣撫使庚子金人
攻方山原統制楊政拒退之辛丑又犯隴安縣吳璘等
擊走之是月水賊翟進陷漢陽軍殺守臣趙令幾桑仲
請合諸鎮兵復中原鄧州守將霍明疑有逆謀襲殺仲
其將李橫擊走明夏四月庚午以翟汝文參知政事壬
午詔內外侍從監司守臣各舉中原流寓士大夫以備
任使癸未詔曰朕登庸二相倚遇惟筠其所薦用之人
不得徧私離間明比害政戊子命呂頤浩都督江淮荆

浙諸軍事庚寅劉豫徙居汴京是月王彥破董先復商
州閏月乙卯宣撫使劉光世父喪起復五月辛酉以權
邦彥簽書樞密院事甲子詔觀察使已上各薦可備將
帥者二人辛未選宗室子伯琮育宮中丙子呂頤浩總
帥至常州部將趙延壽兵叛于呂城鎮頤浩稱疾不進
尋召還甲申親慮囚自是歲如之丙戌置脩政局命秦
檜提舉詔侍從以下暨監司守令條具省費裕國彊兵
息民之策戊子手詔用建隆故事命百官日輪一人轉
對兩浙轉運副使徐康國獻銷金屏障毀之奪其二官
是月韓世忠招曹成降之六月辛丑以李橫爲襄郢鎮

撫使壬寅參知政事翟汝文致仕孔彥舟叛降偽齊是月頒黃庭堅所書戒石銘于州縣秋八月壬辰以孟庾兼權同都督江淮荆浙諸軍事甲午禁買花木珍禽臨安諸門不得放入戊戌召朱勝非提舉醴泉觀兼侍讀戊申給事中胡安國以論朱勝非罷宰執臺諫疏留不報甲寅秦檜罷提舉江州太平觀給事中程瑀等二十餘人坐論駁朱勝非疑其黨檜竝落職奉祠是夕彗出胃九月戊午朔落秦檜職罷脩政局辛酉以彗出大赦求直言壬戌王倫使金還復遣潘致堯等爲金國軍前通問使附茶藥金幣進兩宮乙丑復以朱勝非爲尚書

右僕射同中書門下平章事兼知樞密院事丙戌以王似爲川陝宣撫處置副使是月韓世忠遣將解元大破劉忠干蘄陽忠奔劉豫冬十月甲辰潘致堯至楚州通判州事劉晏劫其禮幣奔劉豫守臣柴春戰死十一月甲戌命李綱劉洪道程昌寓解潛會兵討湖寇楊太戊寅范汝爲餘黨范忠復作亂是月馬友黨步諒詣李綱降綱入潭州其黨郝政降王進吳錫禽王浚湖南盜悉平十二月甲午李綱罷提舉崇福宮甲辰召張浚還仍知樞密院以盧法原爲川陝宣撫處置副使及王似同治司事是冬金人犯和尚原將士乏食自潰吳璘夜拔

皆棄去。虔賊謝達犯惠州，臨安連火，振被災家。是歲封李乾德子陽煥為交趾郡王，高麗來貢。

三年春正月丁巳朔，帝在臨安府。甲子，李橫復潁昌府。乙丑，金人陷金州，王彥焚積聚，退保西鄉。辛未，造渾天儀。庚辰，詔春秋望祭諸陵。二月己丑，簽書樞密院事權邦彥卒。辛卯，王彥引兵會吳玠于饒風關，金人分兵攻之，關破，師潰。四川大震。己亥，金帥撒離曷入興元府，經略使劉子羽走三泉縣，吳玠退屯仙人關，尋合兵擊破之。庚子，以宗子伯琮為和州防禦使，賜名瑗，尋改貴州。辛亥，以席益參知政事，徐俯簽書樞密院事。三月甲子

李橫傳檄諸軍收復東京已而金兵援劉豫橫敗走潁昌復陷夏四月辛亥水軍統制徐文叛奔偽齊是月湖寇楊太僭稱大聖天王立鍾相少子子儀為太子荆南統制羅廣率兵至鼎州不克討而還五月壬戌潘致堯使金還言金人欲重臣通使以取信遂寢出師之議丁卯以韓肖胄同簽書樞密院事是日遣肖胄等充金國軍前通問使乙亥與金人議和禁邊兵犯齊境丙子王彥復金州金兵棄均房去己卯詔周隨京李愿宣押王似盧法原至閬州張浚始解使事庚辰詔李橫等收軍還鎮辛巳罷宣撫司便宜黜陟六月甲午命王瓌率諸

軍討楊太丁未置國子監及博士弟子員己酉岳飛平
虔廣羣盜自虔州班師秋七月己未復置博學宏詞科
癸酉宰相呂頤浩等以旱乞罷政帝賜詔曰與其去位
曷若同寅協恭交脩不逮思所以克厭天心者頤浩等
乃視事乙亥右僕射朱勝非母喪起復九月戊午呂頤
浩罷提舉洞霄宮乙亥以劉光世爲江東宣撫使置司
池州韓世忠爲淮南東路宣撫使置司鎮江王夔爲荆
南制置使置司鄂州岳飛爲江南西路制置使置司江
州冬十一月己未以王倫爲都督府參議官癸亥崔增
吳全遇湖賊于陽武口死之甲子韓肖胄等使金還乙

亥復元祐十科舉士法是冬臨安屢火僞齊兵陷襄陽
又陷郢州李橫等棄城去南丹州蠻莫公晟圍觀州焚
寶戚監殺知監陳烈大理求入貢及售馬詔却之

四年春正月辛亥朔帝在臨安府乙卯遣章誼等爲金
國通問使己卯韓肖胄罷提舉洞霄宮二月癸未席益
罷提舉江州太平觀乙酉以徐俯兼參知政事己亥詔
三衙管軍及將帥觀察使以上舉忠勇知略可自代者
一人三月辛亥朔吳玠率楊政吳璘田晟王喜諸將與
兀朮戰于仙人關大敗之兀朮遁去戊午以趙鼎參知
政事壬戌召孟庾還罷都督府以其兵屬張俊乙丑張

浚至行在、連貶、浚提舉洞霄宮、福州居住、夏四月、癸未、劉子羽貶白州安置、丙戌、吳玠復鳳秦隴三州、甲午、制置使關師古叛、以洮岷二州降、僞齊、吳玠將師古軍、丙午、徐俯罷、提舉洞霄宮、五月、庚戌朔、以岳飛兼黃復二州、漢陽軍、德安府制置使、癸丑、以范冲直史館、重修神宗、哲宗正史實錄、甲寅、岳飛復郢州、丙寅、李成棄襄陽遁、岳飛復取之、丙子、復選宗室子伯玖育宮中、六月、岳飛遣將牛臯復隨州、秋七月、戊申朔、以胡松年簽書樞密院事、壬戌、岳飛遣將王貴、張憲復鄧州、己巳、湖賊萬餘人詣鼎澧二州降、庚午、王貴、張憲復唐州及信陽

軍、襄漢悉平、八月、庚辰、以趙鼎知樞密院事、充川陝宣撫處置使、戊子、改命趙鼎都督川陝荆襄諸軍事、乙未、遣魏良臣等為金國通問使、丙申、毀王安石舒王告、壬寅、王似罷、是月、王瓊坐討賊無功、貶、以岳飛為湖北荆襄潭州制置使、討湖賊、九月、辛酉、大饗明堂、用皇祐典禮、諸神配祀、大赦、庚午、朱勝非罷、提舉洞霄宮、劉豫遣子麟合金兵、自淮陽分道入寇、癸酉、以趙鼎為尚書右僕射、同中書門下平章事、兼知樞密院事、沈與求參知政事、冬十月、丙子、朔、與趙鼎定策親征、癸未、召張浚提舉萬壽觀、兼侍讀、戊子、韓世忠邀擊金人于大儀鎮、敗

之。又遣將董收敗之于天長縣鴉口橋。己丑，金人攻承州。韓世忠遣將成閔解元合擊于北門，敗之。丙申，命後宮自溫州泛海，如泉州。戊戌，帝御舟發臨安。劉錫、楊沂中，以禁兵扈從。壬寅，帝次平江，加贈陳東、歐陽澈官。其子孫賜田各十頃。且追怒汪伯彥，奪其官。黃潛善更不追復。十一月壬子，下詔聲劉豫逆罪，以厲六師。吳玠遣將楊從儀等敗金人于臘家城。乙卯，韓世忠遣兵夜劫金營于承州，破之。己未，復命張浚知樞密院事，以其盡忠竭節，詔諭中外。癸亥，劉光世遣將王德擊金人于滁。州之桑根，敗之。己巳，劉光世遣將王師晟等襲金人于

南壽春府，敗之。執偽齊知府王靖，詔張浚視師江上。十二月壬辰，金齊兵逼廬州。岳飛遣將徐慶牛臯敗走之。劉光世遣將靳賽戰于慎縣，張俊遣將張宗顏敗之于六合。庚子，金人退師，偽齊兵亦遁。是歲，命吳玠通信夏國，保靜州夷人來貢。

五年春正月乙巳朔，日有食之。帝在平江府。己酉，詔羣臣各條上攻戰備禦措置綏懷之策。辛亥，召張浚還。壬戌，以韓世忠為淮東宣撫使，駐鎮江。劉光世為淮西宣撫使，駐太平。張俊為江東宣撫使，駐建康。己巳，金主吳乞買卒，兄之孫亶立。壬申，以劉光世、韓世忠有隙，賜酒。

宋史紀事本末卷九
諭釋之皆感激奉詔二月壬午帝還臨安丙戌以趙鼎
爲尚書左僕射張浚爲尚書右僕射並同中書門下平
章事兼知樞密院事都督諸路軍馬丁亥吳璘楊政拔
秦州己丑建太廟于臨安是月僞齊商元寇信陽軍守
臣舒繼明被禽死之閏月丁未胡松年罷提舉洞霄宮
丁卯王瓚罷尋貶之三月乙未初摧鉛錫張浚視師潭
州夏四月丁未召解潛還諸州鎮撫使至是罷弗置壬
子訪柴氏後襲封崇義公甲子太上皇帝崩于五國城
五月辛巳遣何薜等使金通問二帝己丑以孟庾知樞
密院事戊戌進封瑗建國公以徽猷閣待制范冲兼資

善堂翊善起居郎朱震兼讚讀辛丑命川峽訪求元祐
黨人子孫六月乙巳班統元曆是月湖賊楊欽全琮劉
詵相繼率衆詣岳飛降己而飛急攻湖賊水砦賊將陳
瑄降楊太赴水死餘黨劉衡等皆降飛急擊夏誠斬之
湖湘平得戶二萬七千悉遣歸業戊午減福建貢茶歲
額之半秋七月戊寅趣張浚還朝己卯孟庾罷知紹興
府甲午韓世忠復鎮淮軍八月己未下詔暴章惇蔡卞
詆誣宣仁聖烈皇后罪追貶惇昭化軍節度副使卞單
州團練副使子孫不許在朝冬十月乙卯以席益爲四
川制置大使李綱爲江西制置大使呂頤浩爲湖南制

宋史新編卷九

置大使十一月丙戌命張浚視師荆襄川陝十二月己亥朔以岳飛為荆湖南北襄陽府路蘄黃州招討使楊沂中權主管殿前司併統神武中軍

宋史新編卷九

天保三

